

2 CORÍNTIOS

Paulo Kata Azagâ Ieto Inweniby Corinto Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby Corintodâ Jesus einwânni modoram. Jesus Cristo wâgâ aguenriem induakeyby myakâwândy mâkâ. Waunro kata tinweniby wâgâ ton-honre kehoem myakâwândy aguely Jesus einwânni modo Deus izepa ato aieni modoram. Tâlâ myakâwândy Paulo turudylygue iewiâpani modo. Arâ kehoem tyam aguenriempa myani mâkâ nhutulymo. Xirâ kata wâgâ, Jesus wâgâ aguenriem induakeybyem tawly adâkeze olâ myakâwândy mâkâ-ro warâ; capítulos 10-11 warâdâ, Jesuslâ tywâgâ aguenriem igononi awyly tâgatuze myani. Xirâ kata wâgâ iweniwânmy mâkâ, saguhoem Deus iduery kydawly. Jesus kieiwnântuo olâ, Deus kugukedâ, eataen-hoem kitoem. Xirâ kata wâgâ tytainze kurâ, Corinto donro modo dinheru ingonotobry, Jerusalêmdâ Jesus einwânni modo âdy pebaom modo xurâem.

Aguely adaguhu

1 ¹Urâ Paulo, xirâ kata âyanmo iweninri, Cristo Jesus induakeyby tywâgâ aguenriem, Deus aiedyse atobry ara. Timóteo, Cristo eynynâ kypemugu tarâ yagâlâ merâ, idaenkulymo lâpylâ. Âyanmo xirâ kata kâingonodyly Corintodâ Jesus eynynonro modoram; idânârâ Acaia eynynonro Deus xurâ modoram lâpylâ xirâ kata idâly-ro warâ.

²Âynynâmo Kunwym Deusram, Kywymâry Jesus Cristoram warâ kâenkadyly koendâ nhetomoem, akaladânimo peba nhetomoem warâ.

Koendonro lelâlâ Deus, koendonro lelâ anhekyly warâ

³Aunlolâ Deus kyjiomaene, Kywymâry Jesus Cristo nhunwym, iDeusry warâ. Koendonro mâkâ kagâ.

Kytynru ume, kuomazeâni warâ. ⁴Xina âsenagazeday, Deuslâ xina eon-hondâni, âsenagazeni modo xina eon-hondâdoem, ton-honru nhuduhobry ara lâpylâ. ⁵Cristo âsenagazedobry ara lâpylâ xina âsenagazedily, xina nheinwândylygue. Jesus Cristo tâzeon-hondâoze myani nhunwynram arâ lâpylâ xina âzeon-hondâoly Jesusram. ⁶Âmaemoem koendâ itoenlâ xina âsenagazedily. Tâsenagazedily ume, Deus tâmawyadâduo, tutuze xina âdara on-hondâdilymo awyly, mâsenagazedilymo ume. Xutuze âmaemo âdara on-hondâdilymo awyly. Arâ ise mâuntulymo âdara mâsenagazedilymo mâenmaenlymo awyly. Ton-honre lelâ ise Jesus mâinwândilymo. Xypyry etay Deus âizemo ato ara ise âmaemo. ⁷Koendâ tutuze xina, Jesus einwândilyly mâinmopa mawlymo. Awylygue,

xina ara mâsenagazedylimo-ro watay, on-hondâzemo lelâlâ Deus, xina teon-hondâdobyry ara.

⁸Cristo eynynâ ypemugudo, Ásia eynynâ xina âsenagazedobyry mâuntudyzemo wato. Ton-honre lelâlâ ani xina âsenagazedylly; tâmânreim kehoem tykary wâgâ xina nhanâkyly-ro waunlo ara ani; âdara tyguely amaym tâsemaguely xina nutuwâbyra ani. ⁹“Iweâmaze kyigueho naintai” tâkeze ani xina. Mârâ xina âsenagazedobyry olâ imâem kehoem xina Deus nheinwântoem adyenehonze, âwâlâ kulâba xina âseinwândoem. Deus lelâ kâmayno amaymba kâmakeim, iguwâtyby modo kurâem ingtoni warâ. ¹⁰Kâmayno amaymba xina tâmakeze ani mâkâ, xina emakezezelâ ise-ro warâ. Awârâma xina nheinwânkyly, inwânwânkyly warâ. ¹¹Xina eynynâ Deus agâ aguewâtaungâ. Amyguelymo idase lelâ, kâmaynoem xina awyly ume xina tienmakehoem. Arâ ise koendonro tawyly xinaram nhenehonly. Toenzepa ise, “Koendonro lelâlâ Deus. Koendâ mawânkâ Paulo, eataen-ho modo warâ agâ awyly” kehonly.

**Paulo Corintoram tâtâho
nhugukehobyry**

¹²Deus tynynonro modo aidyse ato ara lelâ xina aidyly, arâ ani mâkâ ize ato xina anhedylly, iozepa kulâ âdy adienyzeba, ânguy tienokudyzeba warâ. Arâ ani xina aidyly, Corintodâ agâmo tawyly ume. Koendonro lelâ, iozeno lelâ warâ ani xina anhekyly, tonomegugue kulâ inkâba, arâlâ mawânkâ ani Deus xina nhenomedâdylly. Arâ ani xina, Deus xurâem koendonro nhenehonly. ¹³⁻¹⁴Tutuzeinhelâ âyanmo xina inwenily, âdy tutuzenry lâpeba. Tâlâ âduaymo âdakeze xina aguely

awyly koendâ xutuim; tâlâ lâpylâ olâ xutudânry modo. Koendâ mâuntulimo olâ ize wato. Arâma ise xina mâen-hoguedylimo, Kywymâry Jesus odopâduo, xina ihoguedomo ara.

¹⁵⁻¹⁶Tutuze wakyntre udâduo, koendâ iedaenkulymo, tuomare lelâ mawylimo warâ. Awylygue Macedônia yan-yam udâday, kodopâday warâ Corintodâ iepagudyze wawyly wâne, âyanmo IU witoem. Agâmo urâ-ro watay, mohomaendomoem adyese tâise urâ, Deus itaumbry âyanmo kâengatulogyue. Tâlâ matomogue uwatâ tâise ani âmaemo warâ, Judeiaram udâhoem. ¹⁷Udâhoem nudupa olâ ani mârâ ume. Awylygue tâlâ keanra âmaemo ewy wakeim: “‘Kyam IU ise tâewyly’ adâkeze Paulo, âdara âeniembra tawyly umelâ” keim. Arâpa olâ. Uguewâdylly kulâ witaymba urâ. Agânhedyseba wato kulâ “Aiese urâ” uguewâpyra urâ. Unâry xugukehoimbe; awylygue ani udâpa widyly. ¹⁸Âdaunloenlâ konokudaymba Deus. Tutuze mâkâ âyanmo auguehobyry inokudomo keba awyly. “Aiese urâ” uguehobyry, agânhedyly; “Agânhepyra ise urâ” uguehobyry, agânhepyra wawyly warâ.

¹⁹Urâ, Silas, Timóteo warâ agâmo xina atay, Jesus Cristo wâgâ âyanmo xina adâkeze ani, Deus imery wâgâ. Ioze lelâ agueim mâkâ; âdaunloenlâ tâdâsenogudyly kewâpyra. Adâkehobyry, adyese lelâ. Adâkehobyry nhugukely nitaymba. ²⁰Cristo wâgâlâ, Deus idânârâ “Aiese urâ” tâkehobyry anhedylly, koendâ aguehonly warâ. “Koendonro lelâlâ âmâ, Cristo wâgâlâ mawânârâ idânârâ amyguehobyry amânhedylly” tâkezelâ kine Deusram. Arâ aguykeduo, idânârâ aguehobyry âkealâ awyly kiuntulylâ. Awylygue “Amém” kykely, (“Arâlâ” kezema aguely.) ²¹Deuslâ

kohondâni, Cristo kienwânsezedoem. Deus kuduakewâm, xurâem kitoem. ²²Tyispiriturylâ akâwâm Deus ingonokyly, kagâ itoem, mâkâ xurâem kydawyly xutuhoem, kysejiguy wâgâ kâzedy kinwenily kurâ xurâem awyly xutuhoem myara. Âdylâ tâwânseim kianâdyse kurâ-ro watay, âdiempa tâpywaze wao kurâ, idânârâ epywaze kydawyly xutuhoem, arâ lâpylâ akâwâm Deus Tyispiritury ingondyly, adâkehobyry modo xuduze mâkâ awyly kiuntuhoem.

²³Xirâ kâinwenily, âkealâ awyly tutuze Deus. Uguewâdyly kulâ-ro watay, Deus ienagazeze. Unâry kâungukeduo ani, Corintoam udâpa widyly. Udâly-ro watay, âmaemo ewy Deus izepa ato aieni modo ton-honre tâusemo tâise ani urâ. Awylygue mawânâni ani âyanmo udâompyra wawyly, âtyenehondyzebamo wawylygue. ²⁴Pymâ ara tâitoem inkâba xina âyanmo tâtâdyze awyly, topize kehoem xina agueho mâinwântomoem aienehonze inkâba. Tutuze urâ, imâem Jesus tâinwânse mawlymo. Ozohonru wâgâ kydawyly olâ ize wato, âurutomoem, mâinwânsezedomoem lakuru, mohomaendomoem, mâkâ ize ato lelâ amânhedylmogue.

2 ¹Awylygue ani “Idâze urâ” keppyenlâ, nhesemo udâpa widyly, âtyenehombamo witoem. ²Udâly lelâ-ro watay, tâjityenze lâpylâma tâise urâ, iutomobyry wâgâ. Aituo tâise awâtârâ won-hondâni modo peba, idânârâ mawânâni tâise tuomareba mawlymo. ³Awylygue ani katalâ âyanmo kâingonokyly awyly, udâpa witoem. Unâzema yangahu oday: “Eyanmo udâly-ro watay, toenzepa âjityenze keanze urâ, kâunrutomo nidapyramo mawânkâ ise. Katalâ wao ise kâingonokyly. Kâunrutomo indadylymo watayma ise, tuomare

kehoem eyanmo udâly. Arâ ise womazely, Deus ize ato anhedylmogue; iomazezemo lâpylâ tyeinwândylmogue warâ” uguema. ⁴Deus izepa ato aieni modope iduaymo kely kâindatuo, kâjityendobyry wâgâ keankâ, mârâ kata kâingonodyly. Toenzepa âwâgâmo kâseguâdâdylygue, kohogüendâ mârâ kata kâinweniday. Mârâ kata mâenmakeduomo mâjityembyra midysemo. Âtywandomoem, tohogueba mitomoem warâ inkâba keankâ kâinwenily, toenzepa âwynedâmo wawyly mâuntuhomoem lakuru.

**Inakanhe adâitobyry wâgâ
âjityeni watay, aitobyry
kyzenanânehonre**

⁵Âduanomo ewy Deus izepa ato aienibyry urâ kulelâ mâkeba intywanâgyuly, mâkâ aitobyry âtywanâdâmo lâpylâ. Inakanhe aitobyry wâgâ aguehonly keba olâ; iwerâ aitobyry enanânehonly. ⁶Mâkâ âsenagazedoem amiendâmolâ. ⁷Iweâma inakanhe aitobyry enanânehonwâdaungâ, iomažeândaungâ warâ, toenzepa kehoem nâjityembyra itoem. ⁸Koendâ kehoem xutuen-honwâdaungâ mâkâ tywyneze lelâlâ mawlymo.

⁹Saguhoem âyanmo kâinwenibyry wâgâ âurudâmo, mâkâ uguondo mâeuntomoem, mâenagazenehon-homoem warâ. Arâ âyanmo kâinwenily ani ikudomoem, mâkâ uguondo wâgâ âurutomobyry ara adâise lelâlâ mawlymo kâuntuhoem. ¹⁰Âmaemo mâkâ inakanhe aitobyry mâenanânehonlymo-ro watay, enanânehonze lâpylâ urâ, mâkâ inakanhe aitobyry tânanânehonzeimbe-ro watay. Âmaemoenlâ arâ awidyly, agânhedylly warâ tutuze lelâ mawânkâ Cristo. ¹¹Adientyby wâgâ âjityeni, kienanânehon-hoem ekani

inakanhe aitobyry kienanânehomba kurâ-ro watay, Satanás tohogueze. Koendâ kehoem tutuzelâ kurâ awârâ. Awylygue mâkâ inakanhe aitobyry kyzenanânehonre, Satanás ize ato kytywanânehonrim aguiempyra kitoem.

Troadedâ Paulo âseguâdâdobyry

¹²Troaderam udâly ani, tonlo modoram unâ koendonro Jesus Cristo wâgâ egatuze. Târâ wawyly ume, mâkâ wâgâ auguehoem adyenehonze ani Deus, pyanta nhenahunguely iegawântoem waunlo ara kehoem. Toenzepa tonlo modo Jesus tâinwânsemo ani. ¹³Ienanaji, Cristo eynynâ kypemugu Tito târâlâ ywânwânselâ waunlo ara ani; târâpa olâ myani mâkâ. Awylygue ani iwâgâ kâseguâdâdyly. Aituo eagâ koxiobyra wituo ani inepa târâpa kâxiguely, Macedônia yan-yam udâhoem.

Unâ koendonro tâinkâ lelâba Jesus wâgâ egatuhobyry

¹⁴“Xina agâ koendonro lelâlâ âmâ, Deus!” tâkeze urâ. Cristo agâ tokalelâ xina awylygue, xina sakaladâze kewâni modope awyly umelâ, xina ewanopyry koendâ tyese olâ Deus. Tâdâjitoguyhodâ emaendânrybyry modo âwâlâ tâtuzemo, myara lâpylâ xina Cristoram âtuly, mâkâ xina iwymâry itoem. Deus tâinkâ lelâba xina ingonodyly, Jesus Cristo kieinwântuo lelâ kydâsemaguely kely wâgâ xina aguehoem, uriza tyânringueim nhârângu MON warâ idadyly wâneam myara idatoem. ¹⁵Deus itaumbryry xina nhegatuduo, Cristo wâgâ xutuly. Itaumbryry xina nhegatuduo, Deus tuomazeze; uriza nhârângu tappalâ kehoem idato ara mawânâ xina agueho âjidaholy. Tâlâ xina aguely izetonro, Jesus tâinwân-

semo, tâzemaleozemo-ro warâ. Tâlâ xina aguely einwântânry modo; Jesus tyeinwândysebanro. Aunloenlâ ise Deus agâpa âieholymo-ro warâ. ¹⁶Jesus einwântânry modo xurâem olâ xirâ unâ inakai lelâlâ, tywângueim kyâim ara kehoem, enanjimo. Jesus einwânni modoem olâ, xina nhegatuly modo koendonro lelâlâ; tyânringueim ara; tâinwânsemo-ro warâ, typygueba ise Deus agâ awylymo. Ânguy ton-honrugue kulâ Jesus einwântuo lelâ tâdâsemaguely kely unâ negatuwâbyra; Deusram enomedâdyby modo lelâ. ¹⁷Turâem âdylâ tienmakehoem kulâ Deus itaumbryry egatuim modo emyenro keba xina. Deus ewanuem xina aidyly, mâkâ ingonotyby tawylygue, âdype tâitoem inkâba. Cristo eon-honrugue lelâ xina âsewanily, adâkely tydase, adienkyly tâense warâ Deus awyly tutuze tawylygue.

Kurâdo agâ iwelo Deus âseinwândobyry

3 ¹Deus xurâem tâwanu wâgâ xina agueduo, tâwâlâ kulâ xina âzehoguedyly mâkeba. Âdaunlo xina awyly koendâ tutuzelâ âmaemo. Awylygue kata ânguy tawyly agueho pebalâ xina adakobâdyly; eagonro modo aito arapa. Tâinkâ lelâba mawânâ Jesus einwânni modoram xina âdutuoly. Awylygue mâinwenibymo xina napyra lâpylâ warâ. ²Kata iweniby emyenro âmaemo, Deus emary xina awyly nhutuhomoem. Aunloenlâ xina nhangahu oday mawylymo. Jesus mâinwântuomo iweloem mâiehohomobyry wâgâ mawânâ, âwanu âduaymo xina anhetyby idânârâam âzeholy. ³Xina aguehobyryenlâ Cristo mâinwântomobyry wâgâ, Cristo aguehobyryenlâ xina ewanu awyly xutuholâ âmaemo, mâkâ kata sani

ewanu xutuly wâne myara. Kurâdo kata inweniwâdyby modo wâgâ kulâba ani Jesus Cristo einwânniem midylymo. Mâkâ mâinwândylymo ani Deus âdaunloenlâ iguedânry Ispirityry wâgâ. Saguhoem judeu domodo ezewenry tuhu wâgâ iweniby mâintainlymogue kulâ inkâba ani mâzemaekolyo. Deus Ispirityry odaximo Cristo mâinwândylymo nhenehon-hombyry wâgâ.

⁴Tâwano wâgâ âduarymo xina arâ aguely, tywâgâ aguenriem Cristo indua-keyby tawyly tutuzema xina. Deus tutuze, tâwanu wâgâ xina agueho iozenolâ awyly. ⁵“Ton-honruguelâ, tonomeryguelâ warâ xina, Jesus Cristo xunâry nhegatuly” xina kewâpyra. Deuslâ xina enomedâni, xurâem xina aitoem. ⁶Jesus einwântuo lelâ tâdâsemaguely kely mawânâ iwelo tâdâseinwândo. Awârâ wâgâ xina nhegatuhoem xina enomedânibryem Deus-ro warâ. Xirâ iwelo tâdâseinwândo Deus xurâ mawânâ inanry xina agueho. Moisés myakâwândy mârâ saguhobyry tâzezewenry iweninri; iwelo tâdâseinwândo olâ Deus Ispirityry aguehobyry. Saguho tâzezewenry Deus agâpa kyenehondâ, ânguy mawânkâ idânârâ mârâ tâzezewenry agueho ara anipyra. Xirâ iwelo tâdâseinwândo olâ kydâsemaguehoem adyese; Jesus einwânni-ro watay, aunloenlâ ise Deus agâ typygueba kehoem awyly.

⁷⁻⁸Saguhoem Deus tâzezewenry inwenily myakâwândy azagâ tuhu wâgâ, Moisés iwy onwa âkuhobyrydâ. Târâ myakâwândy Deus âpanâguely Moisésram iajinu tohozeleim kehoem agâ. Mârâ ehozelu Moisés emydy tohozelanâze lâpylâ myakâwândy. Iwy wâgâpa azagâ tuhugue tuhuaze xytâguydaylâ myakâwândy emydy tohozeleba isezedyly. Arâ awyly umelâ,

ton-honrelâ olâ myakâwândy emydy ehozelu; ipemugudo emydyam MYK itomoem nudupa, ezewenry iweniby nhegatuday. Mârâ tâzezewenry tywâkure, ton-honre warâ âemâ watay; Deus Ispirityry anhekyly makuru koendonro kuru.

⁹Mârâ saguho tâzezewenry kâmakeânry tâzeinwân-honze-ro watay, kâmakeim iwelo Deus agueho kienwândyly koendonro kuru, tâwentâgueba Deus kâendyly awylygue. ¹⁰Tâzezewenry judeu domodo xurâem Moisésram Deus inwenien-hoymby ton-honreim, tohogueim warâ lelâlâ myakâwândy. Iwerâ tâdâsemagueho iwelo olâ imâsedo, toenzepa ton-honreim, tohogueim warâ, saguhobyry takaze kehoem. Ipa mârâ saguho tâzezewenry ton-honreimba ietybyem tâdâsemagueho iwelo agâ. ¹¹Saguho tâzezewenry inepa ton-honreimba ini tohoguezemo myakâwândy. Iwerâ iwelo tâdâseinwândo eon-honru olâ tohoguezem kuru, saguho tâzezewenry takaze kehoem, âdaunloenlâ nadaimpa mawânâ ise.

¹²Iwerâ xina nhegatuly tyanepa kehoem, Deus kâmakehoem tunâry nugukeba awyly xina nhutulygue. ¹³Moisés tâzemyan-hunze myakâwândy âtâgue, Israel domodo tâmydy ehozelu xuzadyly nepyra itomoem. Xina olâ âdy nhoenkyly peba, unâ tâdâsemagueho tiengatuday. ¹⁴⁻¹⁵Deus ezewenrymoem inwenien-hoymby tiuntudyzebamo myakâwândy. Nutuba itomoem, nhangahumo oday xuahuhobe ietybyen-ro waunlo aramo myakâwândy. Alâpylâ iwerâ Deus itaumbry itainduo, nhutuhoem nudupa awyly. Nhangahumo oday xuahuybyenlâ-ro waunlo ara mawânâ. Koendâ nhutulymo ise Cristo nheinwântuomo lelâ.

¹⁶Kywymâry Jesus nheinwândylymo watay olâ, akaemo neinwâmpyra itoem aienehoim tâzetyoze lelâ, Moisés wâgâ Deus itaumbry awo wâgâ iwenibyem ato ara: “Tâmydy xuahum etywânmy, Pymâ Deus agâ oxiodybyem todopâdyly ume” kely iwenibyem. ¹⁷“Pymâ” kely tarâ kâinwenily-ro watay, Deus Ispiriturylâ augueho. Deus Ispiritury kagâlâ ituo, koendâ tutuze kurâ, âzemaakeoybyem kydawyly, mâkâlâ mawânkâ agueim. ¹⁸Kurâ Jesus einwânni modoem olâ âdy kâkuâdâni peba mâkâ wâgâ kiuntuhoem. Kopaelâgâembaba kydâdugueoly, mâkâ ara kisededoem. Deus Ispiritury kagonro awylygue, Kywymâry Jesus ehogu, eon-honru warâ tânehonze kurâ, ispelhu kâgado-pyry nhenehon-ho ara.

**Paulo aitobyry Kywymâry
Jesus emaryem**

4 ¹Kytyeni tawlylygue ani Deus xina induakely itaumbry egaturin-em. Awylygue xina tugûiguepa nipyra awyly, toenzepa eon-honru umelâ, tâsenagazedily umelâ warâ. ²Kywympado toense adyeseim modo adiyendyseba xina. Âdy konokuni xina anientaymba. Cristo wâgâ xina aguehoem, Deus aguehobyry xina nugukewâbyra. Idânârâ xina nhegatyly Deus tyam aguehobyrylâ. Tâentâ, tydatâ warâ Deus awyly tiuntulygue, iozeno modo lelâ xina agueho, âdaunloenlâ konokuni keba xina awyly xutuoem.

³Ânguylâ tâdâsemaguely wâgâ xina agueho nutuba-ro watay, Deus agâpa ietybyem mâkâ, typygueba kehoem tâdâsenagazedoam kulâ idâhoem. ⁴Akaemo nutuba awyly, Satanás, Deus eynynâbaom modo iwymâry mawânkâ nutuen-homba ienehoim. Kurâ enuan-huyby âdy netaymba,

tâwâlâ lelâlâ wâne tyajine awyly, myara mâkâ nutuba itomoem anhe-nehonly. “Koendonro, ton-honreim warâ Cristo. Mâkâ lelâ Deus âdaunlo awyly xutuen-hoim” xina keduo, nutuba akaemo. ⁵“Jesus Cristo einwân-taungâ, mâsemaguehomoem. Jesus âturimo nidâ” warâ xina kely. Xirâ unâ xina nhegatyly Kywymâry Jesus anhetyby wâgâ lelâ, xina anhetyby wâgâ kulâ inkâba. Jesus emary xina. Mâinwântuomo, mâsemaguelymo awyly egatuim kulâ. ⁶Kaudyly ume myakâ-wândy Deus aguely: “Tyajine nidâ iamu oday” kely. Mâkâ Deuslâ kyangahu oday iajimanâni Jesus Cristo kiuntuduo, âdaunlo Deus awyly kiuntuhoem.

⁷Toenze kulâ tâwânseim mâkeba xirâ unâ Jesus Cristo wâgâ xina nhegatyly, xina xirâ egatuwâni modo olâ âmugâ âjimatynri emyenro kulâ. Arâ Deus anhedyly akâwâm, eon-honruguelâ aguienkyly modo aiedyly awyly tienehon-hoem, kon-honrugueba awyly tienehon-hoem. ⁸Âdatay xina Deus xunâry egatuwâni modo, toenzepa tâsenagazeze, tuomareba xina nipyra olâ. Âdatay xina âda tâidyly nutuba tâise, xina nadahuliba olâ. ⁹Toenzepa lelâlâ wâne xina izepanro modope awyly, Deus olâ âdykâ xina nodokeba. Âdatay toenzepa sapioguybyem xina awyly, xina niguepa olâ. ¹⁰Aunlolâ xina izepaom modo xina xyâze kely, izepaom modo Jesus nhyân-hombyry ara. Deus olâmy Jesus kurâem ietomâ. Idânârâ awârâ modo aidyly, Jesus iguedânry xina agâlâ



(2 Coríntios 4.7)

awyly enehon-hoem. ¹¹Tarâ onro anaym xina awyly ume, aunlolâ xina kâmaynoem awyly tyâly wâgâ, Jesus emaryem xina awylygue. Kâmayno modo tianka-dylygue tânehonze xina. Jesus xina agâlâ awyly. ¹²Aunlolâ xina tyiguely amaym, kâmaynoem awyly. Awârâ modo âsebywadoem olâ âzemaekoze âmaemo, aunloenlâ ise Deus agâ mawlymo warâ.

¹³Saguhom Deus itaumbry awo wâgâ iwenibyem: “ ‘Deus tâinwânse urâ. Awylygue iwâgâ auguely’ kewândymy Davi” warâ iwenibyem awyly. Arâ lâpylâ Davi ara Deus tyeinwândylygue, aunlolâ iwâgâ xina aguely. ¹⁴Kywymâry Jesus igueypyem awyly ume, kurâem ietonibyry Deus. Tutuze xina, tyigueduo, kurâem itonze lâpylâ tawyly, Jesus agâ tokaleom ara lelâ xina awylygue. Aituo ise agâmolâ xina adaholy eydâ atoram. ¹⁵Xina âsenagazedily, âmaemoem koendâ itoem, unâ iwâkuru Deus nhuduypy mâindatomoem, agâmo Jesus einwânni modo agui isezedoem warâ. Arâ ise Deus ehoguedily, iomaendily warâ.

**Tâenseny modo wâgâ
kydâpaunzene, tâentuneim
modo wâgâ kulâ inkâba**

¹⁶Awylygue xina tâegane lelâ awyly. Kopaelâgâembaba lelâlâ wâne xina iduadyly, ton-honremba xina idily warâ, xina egadopyry olâ xina oday kopaelâgâembaba iweloem isezedily lakuru, Deus xurâem adâjidyly xina nimopa itoem. ¹⁷Tarâ onro anaym tawyly ara tâsenagazeze lelâlâ xina; âdy keba olâ awârâ. Deus mawânkâ koendonro âdaunloenlâ adaindâny xuduze. Inakanhe lelâlâ wâne tarâ xina âsenagazedily. Mârâ koendonro xina nhemakely agâ, âdy keba waunlo ara kulâ olâ ise awârâ xina âsenagazedobyry. ¹⁸Tâentuneim modo wâgâ

inkâba xina âpaunzedily, tâenseny modo wâgâ. Adainrim kulâma awârâ tâenseim modo, onro anano modo kulâ awârâ. Deus nhuduly olâ ise âdaunloenlâ adainrim keba.

5 ¹Âtâ wakurigue taryeim ara kulâ kodo tarâ onro anaym. Tutuze olâ kurâ, xirâ kodo adainduo, Deus iwelo kodo xuduonse awyly. Târâ kaynâ kodoem Deus nhudulyma ise adainrim keba, âtâ adaindânyem itâdyby emyenro. Deuslâ kodo iwelo aieni, kurâ mâkeba, ²Âdatay tynaze kurâ. Toenzepa Cristo odopâdyly kienuendily. Târâ eydâ atodâ inepa kodo iwelo kido kydawyly. ³Tynwânwânse kurâ xirâ; târâ eydâ iweloem maise kodo. Kâgadopyry lelâba ise; kodope lâpylâ ise. Kydadaimpa ise kurâ-ro warâ. ⁴Tarâ onro anaym kodo tâlâ kydato aunloenlâ nitaymba ise. Tarâ tynaze kurâ, kodo ton-honremba awylygue, tâwâmase, tyduase warâ mawânâ. Inepa kyiguedyse kydawylygue inkâba kynadyly. Deus kodo iwelo kyam nhuduly inepa tâlâ kidyly olâ ize kydato. Aituoma ise kodo iduatyby ipa idylâ; iwelo adaindâny maise kodo. ⁵Jesus kienwântuo mawânkâ Deus turâem kyedyly, târâ kaynâ kodo iwelo tiunduhoem. Tyispiritury igonomâ, tiunduly tâkehobyry xuduze awyly kiuntuhoem.

⁶Deus eydâ atodâ tâitoem âdugukeoze tawyly tiuntuduo, aunlolâ xina iomaru. Tarâ onro anaym tawyly ara, Kywymâry ejidydâ iwaguema xina. ⁷Tarâ xirâ onro anaym tawyly ara, xina Jesus netaymba, tâinwânse olâ xina.

⁸Tutuze xina, iweloem âiehoze tawyly. Toenzepa wâne xina iwelo todope tâidyse awyly, Kywymâry Jesus agâ tâitoem! Koendâ lelâlâ ise xirâ xinaem. ⁹Adienkylygue, adâkehogue warâ Kywymâry iomazeândily

olâ xina ize ato kuru, tarâ onro anaym todo iduanigue, târâ eagâ todo iwelogue alelâ. ¹⁰Idânârâ Cristo enadoram âjidâtýguyoze kurâ; agui-tobryry ara ise mākâ âdy kagâ aini awyly aguely. Idânârâ ise kienmakely, koendonro atay, inakai atay warâ, tarâ onro anaym kydawly ume agui-tobryry ara.

**Jesus Cristo wâgâ Deus
eataen-hoem kidyly**

¹¹Kywymâry Jesus âwankuem xina nietaymba. Tutuzema xina, enadoram âepanâgueze kydawly. Awylygue wâne xina kurâdo nhurudyly, Deus ize ato lelâ aiedyly nhutihomoem. Deus tutuze alâ kulâ xina âdy aniempyra awyly. Arâ lâpylâ âkealâ auguely awyly mâuntulymo. ¹²Arâ kâinweniduo, tâwâlâ kulâ xina âzehoguedyly mâkeba augueho. Âduaymo Deus eon-honrugue adientyby wâgâ auguely, awârâ wâgâ madawihomoem, xina xunâgueni modo aguely watay, mâin-hogulymo mâuntuhomoem. Xina xunâgueni modo adienkyly wâgâ tâzehogueoly kulâ ize atomo. Deus tohoguedo wâgâ nâseguâdâ-byramo olâ. ¹³“Tyangahugoengueim mâkeba Paulo domodo” tâkezemo. Tyangahugoengueim keba kehoem wâne xina; xina nhenomedâdo olâ Deus xurâenlâ. Koendâ xina xunâgu tyangahu oday watay, âynynâmo xina âsewanihoenlâ.

¹⁴Jesus Cristo toenzepa tywyne-dylygue, koendâ kehoem xurâem xina âsewanily. Koendâ tutuze xina, Cristo iguwâm idânârâ xurâem. Mākâ iguehobyry wâgâ, eagâlâ idânârâ kyiguely lâpylâ waunlo ara Deus xurâem. ¹⁵Idânârâ kurâ domodoem myakâwâm mākâ iguely. Kurâ mākâ einwânni modo iweloem tâiehoze kurâ; eagâ tokaleoem

ietybyem kurâ. Iomazeânzelâ aguidyly mākâ ize ato. Kâmakeze mawânkâ myakâwâm iguely, kurâem itondyly warâ. Âwâlâ kulâ kydzehoguedoem, ize kydato kulâ aguietoem warâ inkâba, mākâ kyize awyly.

¹⁶Cristo idânârâ tywyneze awyly kiuntuduo, ânguy kiunâguedaymba kurâ, Deus ize ato modo agâ âsein-wândânry modo aguehomo ara. Cristo kienwâmpyra kydatay, âdalâ kulâ ani aguykewâdyly Jesus wâgâ, einwân-tânry modo agueho ara kulâ. Iwerâ olâ kurâ arâ aguykeba. ¹⁷Jesus einwânni modo iweloem ietybymoem mawânkâ. Nhangahu oday xunâry saguhobyry, anhekyly warâ adaim-pyem, idânârâ kehoem iweloem ietybyem awyly.

¹⁸Deus lelâ mawânkâ iweloem kyeni. Saguhom Deus agâpa kye-nipe akâwâm. Jesus kruz wâgâ iguehobyry wâgâ olâ, Deus iduery-pyryem, eataen-hoem kidyly. Eagonro modo eataen-hoem itomoem lâpylâ aguykehoem adâkeze akâwâm Deus. ¹⁹Cristo iguely myakâwâm inakanhe aguitobryry xygakeze. Awylygue tâwentâgueduneba kurâ. Xirâ mawânârâ unâ xina nheगतuly: Jesus mâinwântuomo, Deus iweloem âetondâmo lelâ, mākâ eataen-hoem mitomoem. Deus aguehobyry aralâ xina nheगतuly.

²⁰Cristo ezedy wâgâ agueim xina. Deuslâ agueim, arâ xina aguehoen-ro waunlo ara, xina agueho mâindatomoem. Cristo ezedy wâgâ agueim xina awylygue, “Deus âmaemoem adientyby ato kâjimetaundâ” xina kely. “Tâwâlâ Deus âgukemo, eataen-hoem mitomoem, âmaemo saguhom eynynâbaombyry modo” xina kely. ²¹Cristo âdaunloenlâ Deus izepa ato kulâ anientaymba. Âdy ewentâguedo

peba awyly umelâ, inakanhe agui-
tobyry wâgâ âsenagazedoem aiemâ
Deus. Cristo iguely myakâwâm, kiein-
wântuo, eagâ tokalelâ kituo warâ
tâwentâgueba Deus kâentoem.

6 ¹Deus emary modo xina itaum-
byry egatuim; awylygue âyanmo
aguezesedyly xina nimopa awyly:
“Âmaemoem koendonro lelâlâ Deus;
Cristo tâinwânse âmaemo-ro warâ.
Aituo Deus ize ato lelâ aietaungâ,
agâmo koendâ ato alâ kulâba itoem”
xina kely. ²Isaías iweniwânmy Deus
aguehobyry:

“Koendonro wawyly
kâenhondyze wato
saintuo,
mâenkadybymo tuduze ani
urâ.

Imakehomo saintuo, imakemo’
kely Deus.”

Koendâ xutuwâdaungâ. Koendonro
tawyly Deus nhenehon-ho naintai.
Iweâ lelâlâ agâmo koendâ tâidyse!
Iwerâlâ imakedyzemo awyly!

³Deus xurâem tâwanopyry
xunâguedyze inkâba xina. Awylygue
Jesus tyeinwândyse donro modo
ekuâdâni adiyndyseba xina awyly.
⁴Idânârâ adienkyly wâgâ Deus emary
tawyly tânehonze xina. Awylygue
toenzepa tâsenagazedyly, âdy peba
tawyly, kâmaynoem tawyly warâ xina
nhemaenly, Jesus tyeinwândyly xina
nimopa olâ. ⁵Toenzepa tâmaenze xina
tapioguly, tâtadâdyly, tudueryem ityby
modo tânagazedyly warâ. Tokozely
takaze kehoem tâsewanily, nykyba
tawyly, typynigueba tawyly warâ
tâmaenze xina. Arâlâ olâ Jesus Cristo
einwândyly xina nimopa awyly.

⁶Iozeno lelâ xina anhekyly. Deus
âdaunlo awyly, anhekyly, koendâ
awyly warâ tutuze xina. Idânârâ
tâsenagazedyly tâmaenze xina,

“Kienmaemba enra kurâ” xina
kepalâ. Idânârâ agâ koendâ lelâ xina.
Tywynezemo tawyly tânehonze xina.
Deus Ispiritury xina agâlâ. Idânârâ
awârâ modo tânehonze, Deus emary
xina awyly. ⁷Unâ âkealonro xina
nhegatuly. Deuslâ xina eon-hondâni
warâ xurâem xina âsewanihoem. Deus
ize ato xina anhekyly watay, âsema-
gueze xina tuduery modo amaymba,
tâsemagueho, tâpeândo warâpe
tawylygue.

⁸Tâlâ xina wâgâ koendâ aguewâni
modo; tâlâ lâpylâ inakanhe aguewâni
modo warâ. Tâlâ xina iwykewâni
modo, tâlâ lâpylâ xina ehogueni
modo warâ. Tâlâ, “Konokuni akaemo”
keim modo. Âkealâ olâ xina aguely.
⁹Tywâgâ aguenriem Cristo ingono-
tybylâ xina awyly xutudânry modope.
Tâlâ lâpylâ olâ ingonotybylâ xina
awyly xutuwâni modo. Xina âdyoze
tâkeze inanry, xina nâdyopa olâ. Xina
âsenagazeoly wâne, xina niguepa
olâ. ¹⁰Âdatay tytywanze wâne xina;
tuomareba xina nipyra olâ. Âdy peba
wâne xina. Xina aguely idataynrin
modo Jesus nheinwântuomolâ
Deus nhuduly koendonrope tâisemo.
Âdy peba lelâlâ wâne xina, Deus olâ
idânârâ xina ipa ato tuduze; aituo
pylâ tydinherugueim ara lelâlâ xina
awyly-ro warâ.

¹¹Jesus einwânni Corinto donro
modo, toenzepa âwynenimo wawy-
lygue, xirâ kata wâgâ âdy augueho
koentaymba urâ. Âdara yangahu
oday unâry awyly mâuntudyzemo
wato, xina âdara aieholy awyly warâ.
¹²Âwynedylymo xina nimowâbyra;
âmaemolâ olâ xina iwynedyly imorim.
¹³Tâjiunwym tymery tinwynegylyam
inweniho ara âyanmo kâinwenily.
Toenzepa xina âwynedylymo, arâ
lâpylâ xina iwynedaungâ uguely.

**Kywymâry Jesus einwântânry
modo agâ on-hoam tâiseba itaungâ**

¹⁴Jesus eynynâbaom agâ kulâ tokaleom ara tâiseba itaungâ; tapirâ, kawaru agâ adatado iwýkâjiby araba. Jesus einwânni, einwântânry warâ ize ato âzekiba nitaymba. Koendonro, koendâpaom agâ âzekiba nitaymba. Iajinu âzekiba nitaymba iamu agâ. Jesus xurâ, Satanás xurâ warâ âzekiba inkâba. ¹⁵Cristo, Diabu agâ nâseinwândaymba. (Diabu keho lâpylâ Satanás ezedy.) Cristo einwânni, einwântânry agâ nâseinwândaymba. ¹⁶Deus ety, xygatyby modo etyem tyetuneba. Kurâ Jesus einwânni modo Deus âdaunloenlâ iguedânry ety kurâ. Deuslâ arâ ageuim:

“Iwerâ ynnonro modo agâ ise urâ;
aunlolâ ise eagâmo wawyly.

IDeusrymo ise urâ; akaemo ise
ynnonro-ro warâ”

kewândymy Deus saguhoem.

¹⁷Iwenibyem lâpylâ Kywymâry
Deus aguehobyry:

“Yeinwântânry modo
sodokewâdaungâ,
akaemo ara inakanhe kulâ
amipyra mitomoem.
Anhekylymo inakai modo
kâdynanâdaundâ.
Ynynâbaom modo anhekyly
mâinmolymo-ro watay,
tuomare kehoem ise;
yam modopâdylymo
kâinwânwândyly.

¹⁸Unwânmo ise urâ.

Ymeombyry ise âmaemo warâ”
tâkeze Kywymâry Deus ton-honreim,
warâ iwenibyem awyly Deus itaumbry
awo wâgâ.

7 ¹Yataen-hodo kâinwynegyly,
arâ mawânkâ Deus Kunwyn-em
tawyly aguely, kurâ pylâ xurâ-ro warâ.
Awylygue idânârâ Deus agâpa kyene-

horim modo aiedyly kyjimonre. Ize
ato wâgâ lelâ kydâpaunzene; ize ato
lelâ aguyjiesezene. Deus âwankuem
kiempyra kine. Eyam kydâtunre,
keinwântoem.

Paulo iomazehobyry

²Xina tywyneze mawylymo enehonwâdaungâ. Agâmo Corintodâ tawyly ume, ânguyem xina inakai anientaymba keankâ. Ânguy Deus izepa ato anhe-toem xina anienehonwâbyra keankâ. Ânguy xina nenokudaymba keankâ, idinherurumo tienmakehoem kulâ warâ. ³Idânârâ, xina mâunâguedylymo arâ uguely mâkeba. Toenze kulâ xina inwynegyly mâkeba âmaemo, tâwâlâ lelâlâ wâne âdylâ aidyly, xina iguehoem atay, xina niguepa itoem atay warâ. Ânguy kulâ, âdy kulâ warâ olâ ise xina âwynedomo naimpa. ⁴Tâinwânse lelâlâ urâ, Cristo tâinwânse lelâlâ mawylymo. Arâ mawylymogue, ihoguedâmo urâ-ro warâ. Tuomare lelâlâ urâ âwâgâmo. Toenzepa lelâlâ wâne xina ekuâdânibe awyly, tuomareba wipyra olâ urâ.

⁵Xarâ Macedônia yan-yam saintybyem, âdalâ xina nekobyze-guewâbyra keankâ. Tâinkâ lelâba keankâ inakanhe tadawyly. Deus eynynâbaom modo xina agâ iewiâ-kymo. Tâdâjitoguyhodâ-ro waunlo ara keankâ xina âdutuly. Toenzepa keankâ xina eanu tuoday. ⁶Deus, tytyroneim modo iomazeâni olâ keankâ xina iomazeâni. Tito mawânkâ nigonodâ âydonromopyryem xarâ xinaram. ⁷Saintobyry wâgâ lelâba olâ keankâ xina iomaru, âwâgâmo xinaram nhegatuyby wâgâ warâ. “Corintodâ Jesus einwânni modo womazeân-dâmo, eagâmo wawyly ume. Âmâ, agâ idâwâtyby modo warâ tywyneze lelâlâ akaemo. Tytyne akaemo, tudua-nomo ewy inakanhe aitobyry wâgâ.

‘Aietaungá’ myguehobryr adientysemolelâ. Âynynâ adâkedyzemo lelâ âynynâba kulâ aguewâni modoram” kely keankâ Tito xinaram, xarâ saintybyem. Agueduo, urâ, yagonro modo warâ toenzepa lelâlâ xina niomaze.

⁸Mârâ kata saguhoem âyanmo kâingonotyby mâintainduomo, âurutomobryr wâgâ tâjityenze ani âmaemo. Arâlâ olâ, arâ âyanmo kâinwenihobryr wâgâ âdapa lelâ wawyly. Âtywanânehon-homobryr wâgâ saguhoem kâjityendâ lelâlâ wâne ilema-ro.

⁹Iwerâ olâ tuomare urâ, “Izepamato adientobryr wâgâ tâjityenzexina. Xina inakanhe aitobryr xygakegâ” Deusram myguehomobryr wâgâ. Izepa ato amânhetomobryr wâgâ mâjityendylmolâ mawânkâ Deus ize ato. Awylygue mârâ kata wâgâ kâinweniduo inakanhe awidyly mâkeba keankâ âmaemoem. ¹⁰Kydâjityenduo, inakanhe aguitobryr kinmoduo warâ, Deus tygakeze mârâ inakanhe aguitobryr, nhygakehoem kienkaduo. Aituo Deus kâmakely, xurâem lelâ kitoem. Awylygue kuomazely mâkânra kydzemakeoduo. Jesus einwântânry modo olâ tâjityendylmo umelâ, Deusram inakai adienkyly timohomoem nekabyramo. Awylygue ise Deusram nâzemakeoba awylymo. Aunloenlâ ise eydâ iwague awylymo.

¹¹Âmaemo mâjityendomobryr olâ Deus xurâem alâ kulâba. Awylygue ani inepa kehoem kata wâgâ âurutomobryr ara amidylmo. Toenzepa ani inakanhe mawylymo, inepa kehoem Deus nhygakedyze mawylymo. Toenzepa âewiâpadâmo inakanhe aini wâgâ. Âduaymo aityby wâgâ Deus inagazenehonylmo tytaze ani âmaemo. Iedyse ani âmaemo. Iozeno lelâ ani amânhedyse matomo warâ. Awâkâ uguondo muru-

dâmo, magâikemo, menagazedâmo warâ. Idânârâ amânhetybymo wâgâ, tâwentâzeba mawylymo menehomo.

¹²Mâkâ inakanhe aini mâenagazedomoem kulâba, inakanhe ietyby mâenmawyadâdomoem kulâba warâ ani kâinwenily, Deus enanaym, tâwâlâ âmaemolâ toenzepa xina tywyneze, tâinwânse warâ mawylymo mâenehon-homoem olâ ani kâinwenily kuru. ¹³Igarymo tindatuo, toenzepa xina niomaze.

Igarymo wâgâ kulelâba olâ xina iomaru, Tito, xarâ saintybyem âwâgâmo iomarugue lâpylâ warâ. Agâmo tatay mykeankâ, toenzepa eganu âwâgâmo. ¹⁴Tito Corintoam idâly iraynâ, koendâ ani âwâgâmo auguely eyam. “Kata kâinweniby wâgâ kâunrutomobryr ara ise aidylmo” uguely ani eyam. Auguehobryr ara kehoem myani aidyly-ro warâ. Koendâ mawânkâ medaenkumo; kata wâgâ âurutomobryr aralâ amidâmo. Idânârâ âyanmo auguehobryr âkealâ, Titoram âwâgâmo auguehobryr âkealâ lâpylâ warâ. ¹⁵Atârâ agâmo tatay, âurutomobryr koendâ lelâ mâindatomobryr, âwankuem mânhepyra matomobryr warâ tienanâgueduo âwynedâmo inanry Tito. Âwâgâmo aguely koendâ eagâ matomobryr wâgâ. ¹⁶Toenzepa kohomaendily; tutuzema urâ, auguehobryr aieniem mawylymo.

**Tâwânrempa kehoem
âdypebaom modoram tâlâ
tato ewy nhuduhomobryr**

8 ¹Cristo eynynâ ypemugudo, koendâ lelâ Deus Macedônia eynynâ Jesus einwânni modo agâ, xirâ mâuntudyzemo wato. ²Toenzepa tâzenagazeozemo Jesus eynynâbaom modoram. Arâlâ olâ, toenzepa ohoemaendylmo. Âdy pebaom modo

xurâem imâem kehoem tâlâ tato ewy nhudulymo tâwânrempa kehoem, âdy peba tawly umelâ. ³Tutuze urâ, tâlâ tato takaze kehoem nhudulymo, tâwâlâ ize tawlyguelâ. ⁴Aunlolâ ani “Toenzepa xina dinheru tiundudyse awyly Judéia eynynâ âdy pebaom modo Jesus einwânni modoram” kezesedylymo. ⁵“Imâemba kulâ isenra nhudulymo” xina nyguedâdâ. Imâem olâ ani dinheru nhudulymo. Waunroem kuru warâ aguelymo: “Kywymâry Jesus ize mato xina anhotoem amyguhobyry lelâ xina adiyndyse ato” kelymo. Xinaram aguelymo ani: “Amyghehomobyry ise xina anhekyly, awârâ mawânâ Deus xina anhedyse ato” kelymo.

⁶Tito awyarâ âyanmo idâppyem, dinheru mâunduypymo emakely nagu. Ize mawlymoguelâ mâundulymo, tâwânrempa kehoem! Aituo xina aguely Titoram: “Magüpyne kâjimo. Eagâmo mataymo, dinheru âdypebaom modoram tiundudyse atomo emakelyem emawyadâgâmo, iomazehomoem” xina kely. ⁷Koendâ lelâlâ Deus xurâem iwanumo amânhe-dylymo. Jesus Cristo tâinwânse lelâlâ âmaemo. Tutuze âmaemo koendâ unâ iwâkuru tâdâsemagueho egatuly, koendâ tutuze âmaemo Deus wâgâ. Tuomare âmaemo Deus xurâem mâse-wanidaymo. Toenzepa lâpylâ xina mâinwynedylymo. Awylygue, koendâ Deus xurâem amânhekylymoguelâ, âdy pebaom modoram ipa atomo xuduwâ-taungâ, mâundupa tâiseba itaungâ.

⁸Arâ kâinweniduo, âtudyzemo wawly mâkeba. Macedônia eynynâ Jesus einwânni modo tuomare lelâ dinheru nhuduhomobyry olâ mâuntudyzemo wato. Arâ ise mâuntulymo Cristo einwânni modo agâ mâpynedomo âkealâ, âkealâba warâ awyly. ⁹Tutuzelâ

âmaemo, Kywymâry Jesus Cristo kywyneni awyly. Târâ kaynâ tunwym agâlâ idânârâ sodoem tawly umelâ, nhânwânmy. Uguondo âdy pebaon-em imâ tarâ onro anaym, arâ aidyly myakâwâm, toenzepa kywynedylygue. Arâ aitobyry wâgâ idânârâ koendonro modo Deus nhuduly mâenmakelymo.

¹⁰Urâ yangahu oday unâry. Koendâ tâise mârâ anu sakadyby wâgâ magüpyymo mâenwanikelymo, uguely. Âmaemolâ ani âdy pebaom modoram tuduzeinhe dinheru emakely wâgâ waunroem tyangahueim. Âmaemolâ lâpylâ ani waunroem kuru xuduly sagurin-ro warâ. ¹¹Aituo magüpyymo ewanikewâ-daungâ. Tuomare ani âdinherurumo ewy âdy pebaom modoem mâundulymo mangulymo. Tuomare lelâ lâpylâ dinheru eyanmo tugonoseim mâundulymo ewanikewâdaungâ, tâlâ matomo aralâ. ¹²Deusram âdylâ kiundudyse kurâ-ro watay, tâlâ kydato aralâ kiundudyse awyly; ipa kydato nekadaymba.

¹³⁻¹⁴“Âdy pebaom modoram âunduwâtaungâ” ugeduo; “Âdy peba itaungâ” uguely mâkeba âyanmo. Âzekiba mawlymo xina ize ato. Jerusalêmdâ Jesus einwânni modo ipa ato sanâtoem dinheru âunduwâtaungâ olâ, âdy peba mawânkâ akaemo, tâlâ âmaemo-ro warâ. Wayam âmaemo pylâ ipa mituomo, xuduzemo lâpylâ mawânkâ. Âzekiba ise mâsema-wyadâdylymo. ¹⁵Warâ myakâwândy Deus itaumbry awo wâgâ iwenibyem awyly, Israelita domodo typyniry “maná” nhaunkudaymo.

“Mâkâ imâem saunkuimbyry
nâsegubydâbyra akâwâm
xurâem.

Mâkâ imâembalâ saunkuimbyry
olâ akâwâm ipa nipyra.”

Tito, eagâ tâwaneim modo warâ

¹⁶“Koendonro lelâlâ âmâ, Pabai, Tito Corinto donro modo tienmawiyadâdyze itoem amânhenhon-homyry wâgâ, xina akaemo tienmawiyadâdyze ato ara lâpylâ” tâkeze xina. ¹⁷Corintoam idâontoem xina agueduo, “Idâze lelâ urâ” nygue. Eyam xina aguely iraynâlâ, toenzepa keankâ nhetondyzemo awyly. ¹⁸Cristo eynynâ kypemugulâ eagâ xina ingonokyly lâpylâ. Tarâ Jesus einwânni modo koendâ inanry aguelymo awâkâ Tito agâ idâim wâgâ. Deus emary koendonro mawânkâ, Jesus einwântuo lelâ tâdâsemaguely awyly wâgâ agueim awylygue. ¹⁹Koendâ mawânkâ Jesus Cristo xurâem ewanu. Awylygue Jesus einwânni modo niduakemo xina agâ Jerusalémram idâhoem, dinheru Deus eynynonro modoram xuduypy sase. Xina aiese awârâ, Kywymâry Jesus koendâ egaetoem, einwânni âdy-pebaom modo tienmawiyadâdyze xina awyly xutuhoem lâpylâ warâ.

²⁰Imâem ise xina dinheru nhadyly. “Turâem kulâ akaemo mârâ dinheru nhadyly” ânguy kepa itoem ise xina kulelâba xina idâly awyly. ²¹Kywymâry Jesus xurâem, kurâ domodo xurâem warâ iozeno lelâ xina adienyze ato.

²²Tito domodo agâ tokalâ Cristo eynynâ kypemugu ewy xina ingonodyly lâpylâ. Kywymâry ewanuem xina tienmawiyadâdyze tawyly tânehonzelâ mawânkâ. Âwâgâmo koendâ aguehonly tydase. Âdy pebaom modoram dinheru mâundudyse mawlymo, tâinwânse. Awylygue iomaru kuru âyanmo tâtâhoem. ²³Yataen-holâ awâkâ Tito; Cristo einwândyly wâgâ âyanmo aguelyem iemawiyadânîlâ. Cristo eynynâ kypemugu modo Tito agâ idâim, tâinkâ lelâba Jesus Cristo einwânni modo eynynâ aguenriem

iduakeybylâ akaemo. Akaemo ewanu wâgâ ise Kywymâry Jesus koendonro awyly âzegaeholy. ²⁴Akaemo iduakeyby modo idâly iraynâ, “Corinto donro modo koendâ ise idaenkulymo. Mâenkadybymo ise anhekylymo. Koendâ lelâ ise akaemo tydinheruru âdy pebaom modoram nhudulymo” ugue eyanmo. Awylygue, saindylymo-ro watay, auguehobyry ara lelâne aitaungâ. Arâ ise tywynezemo mawlymo nhutulymo. Tâinkâ lelâba Jesus einwânni modo xutuzemo koendâ auguehobyry awyly.

**Jesus einwânni modo Judéia
eynynonro âdy pebaom modoram
dinneru nhuduhomobyry**

9 ¹⁻²Akaemo Jerusalém donro âdy pebaom Jesus einwânni modoram dinheru igonodyly wâgâ toenzepa tywenize urâ. Idânârâ tutuzelâma âmaemo ize mawlymoguelâ eyanmo dinheru mâundulymo awyly. Jesus einwânni Macedônia eynynonro modoram auguelâ: “Corinto donro modo, xidadâ iwaguepa tâtyuneim modo warâ ize tawlymoguelâ dinheru nhudulymo, Judéia eynynonro Cristo eynynâ typemugudo xurâem. Awârâ anu sakadybylâ dinheru idâtyguely nagumo” ugue eyanmo. Arâ amânhetybymo tiuntuduo, Macedônia donro modo, aramo adâidysemo lâpylâ.

³Âwâgâmo koendâ augue: “Corinto donro modo âdy pebaom modoram tâlâ tato ewy tiundudyse, tiundudysemo lelâlâ” ugue. Awylygue udâly iraynâlâ, Tito, eagonrodo warâ kâingonodyly dinheru mâindâtyguhomoem omazeânzemo. Yaintuo, idânârâ nhontybyem lelâ ise kêandyse wawyly, âynynâmo koendâ auguehobyry ara kehoem, auguehobyry âkeâ lelâlâ itoem. ⁴Dinheru nhontybyemba satoen-ro watay, urâ, Macedônia

donro modo ewy yagâ idâim warâ saintuo, âpybazezema xina, âpybazeze lâpylâ âmaemo-ro warâ. ⁵Awylygue keankâ Cristo eynynâ kypemugudo, udâly iraynâlâ, kâingonodyly, dinheru xuduypy nhondylyem imawyadâ-domoem, idânârâ nhontybyem itoem, amyguehomobyry ara. Arâ ise idânârâ nhutulymo, tuomare lelâ mâundulymo awyly. Ânguy keba, “Jerusalém donro âdy pebaom modoram dinheru xuduwâ-taungâ” keim awyly warâ. Tâwâlâ mâundulymo, ize mawylymogue.

⁶Xirâ enanâguewâdaungâ: “Mâkâ imâemba etânibyry, imâembalâ nhekaunâdyly. Mâkâ imâem etânibyry, imâenlâ nhekaunâdyly warâ.” Arâ ise Deusram kydâzeholy, âkelo modo kientobyry ara. ⁷Waunroem wao koendâ angahumo oday xutuwâ-daungâ, âdara dinheru mâundulymo awyly. Tuomare kehoem mâundulymo xuduwâtaungâ, mâundudyse mawyly-moguelâ, tytyremba, ânguy “Xudugâ” keduopa warâ. Mâkâ tuomare kehoem xuduim Deus inwynegyuly kuru. ⁸Koendonro modo xuduze lelâ Deus âyanmo, âdy peba mipyra mitomoem, âdy pebaom modoram mâundulymope lelâ mitomoem lâpylâ warâ. ⁹Warâ Deus itaumbry awo wâgâ iwenibyem awyly Deus ize ato aieni modo wâgâ:

“Tâwânrempa kehoem ipaom
modoram nhuduly.
Aunloenlâ ise Deus koendâ
aitobyry nhenanâguely;
koendonrogue lâpylâ ise
nhepywadyly”

warâ iwenibyem awyly.

¹⁰Etâni modoram ewy xuduim mawânkâ Deus, einrim modo ipyniry xuduim warâ. Arâ lâpylâ ise tâwânrempa kehoem âyanmo nhuduly, âmaemo âdy pebaom modoram tâwânrempa kehoem mâunduhomobyry ara

lâpylâ. Mâkâlâ ise tâlâ matomo imâem ienehoim, âdy pebaom modoram mâundulymope mitomoem. ¹¹Imâem ise âyanmo Deus koendonro nhuduly, tâwânrempa kehoem âdy pebaom modoram mâunduhomoem lâpylâ. Awylygue ise agui Deus wâgâ koendâ aguewâni modo awyly, dinheru tuomare lelâ xuduypy eyanmo xina nhakyly wâgâ.

¹²Âdy pebaom modoram mâunduly-ro watay, ipa atomo kulelâ inkâba mâunduly, Deus wâgâ koendâ aguehomoem adyenehonze lâpylâ âmaemo. ¹³“Koendonro lelâlâ Deus, xinaram âdinherurumo ewy mâingonotyby-mogue xina âzedily awylygue” kezemo. Deus ize atolâ amânhekylymo awyly tânehonze awârâ. Mâunduypymo emakeim modo koendâ ise Deus wâgâ aguelymo. “Koendonro lelâlâ âmâ, Deus, Corinto donro âynynonro modo unâ Cristo einwântuo tâdâsemaguely aguehomoem, amyguehobyry anhedilymogue. Xinaram dinheru nudumo tâwânrempa kehoem. Xinaram lelâba, âkelo anano âdypebaom modoram nudumo lâpylâ warâ” kezemo Deusram. ¹⁴Aunlolâ ise akaemo Deus agâ aguely âynynâmo, tutuzemo mawânkâ Deus koendâ agâmo awyly. “Corinto donro modo agâ koendâ lelâlâ âmâ, xina agâ koendâ itomoem amânhenehon-hombyry wâgâ” kezemo Deusram. ¹⁵Koendonro lelâlâ Deus, kâmakehoem tymery ingonotobyry wâgâ. Âdakykeho peba gâlâ kurâ.

**Jesus Cristo Paulo induakehobyry,
tywâgâ aguehoem**

10 ¹“Tarâ kydâ tatay, MYK alâ kulâ ani Paulo, ton-honre kehoem aguely nitaymba. Iwague tawylygue kulâ mâkâ kata wâgâ agueze eon-honru” tâkeze âmaemo-byry ewy. Aypa olâ, aypa lelâlâ!

Koendonro, kywyneni warâ Cristo; âdakepalâ ani tynynâbaom modo agâ koendâ awyly. Mâkâ ara ize wawyly. Koendâ kehoem augueho idataungâ, Cristo aguehobyrenlâ auguely awylygue. ²Awyarâ yaindyly-ro watay, ton-honre kehoem agâmo auguedyse inkâba urâ. Tutuze olâ urâ awâtârâ: “Deus eynynâbaom modo aito ara kulâ awâkâ Paulo aidyly” keim modope awyly. Arâ aguewâni modo agâ olâ ton-honre kehoem agueze urâ, kewâdylymo kulâ awylygue.

³⁻⁴Kurâ xina aramolâ. Iozepa kulâ Cristo wâgâ aguewâni modoram xina agueduo olâ, tonokuze kulâ, tyewiâse kulâ warâpa xina aguehomo in-hoguly. Pyrâugue mawânkâ sodadu tuduery agâ âseguebyly, myrarâ lâpylâ xina Deus eon-honrugue aguely, unâ tâdâsemagueho tiengatuday. Tyangahu oday tunârygue kulâ inkâba xina aguely, Deus eynynâbaom modo agueho ara inkâba. Sodadu tuduery modo otoendo sahodâdyby nhain-ho ara lâpylâ akaemo nhangahu oday inakanhe xunâgomo xina nhainly, Deus eon-honrugue itaumbry xina tiengatuday. ⁵Deus tonomery nhuduypyguelâ xina, akaemo Cristo wâgâ nhenomedâdomo iozepa awyly nhutuen-honly, tyangahu odano kulâ tâpaunzedomo awyly nhutuhomoem. Deus itaumbry xina nhegatuly, âpaunzedomo iozepaom âtuguguehoem, Cristo lelâ nheinwântomoem. ⁶Iwerâ, agui âmaemo ewy âurutomo tindadysedonro modo. Tâlâ âduaymo auguely tyeinwândysebaom watay olâ yaintuo, ton-honre kehoem eusemo urâ, sodadu iwymâry ton-honre kehoem tâinwântânry nheuto ara.

⁷Koendâ mâuntuba kulâ kurâ koendonro, inakai warâ awyly amyguelymo, mâendylymogue kulâ. Awylygue

mawânkâ, “Cristo tywâgâ aguenriem aguehobyry xina” keim modope awyly. Mâkâ wâgâ aguehoem aguehoymbyem akaemo watay koendâ wao nâpaunzedâmo. Iwâgâ aguehoem aguehoymby lâpylâma xina! ⁸Saguhoem âyanmo auguelâ, iwâgâ kêengatuhoem Kywymâry Jesus ingonotybyem wawyly. Tywypazeba, mâkâ wâgâ aguenriem wawyly, augueondyly, âkealâ mawânâ. Mâkâlâ aguenriem ugononi. Âihugueândomoem inkâba mâkâ uduakely, Deus Ispiritury amânhetomoem aguehobyry mâinwânsezedomoem lakuru.

⁹Mâseanedomoem inkâba arâ kata kâinwenily. ¹⁰Tâlâ warâ aguewâni modo: “Tinweniby modo wâgâ, ton-honre kehoem Paulo kurudyly, pymâ mâkâ-ro waunlo ara, kuduay watay olâ, adâkeho ara aguepa. Agueho âdyem nipyra” tâkezemo. ¹¹Xutuwâdaungâ xirâ: Deus izepa ato aieni modoram agueho, eydâmo iwaguepa watay, kata âyanmo kâin-gonokily wâgâ alelâ âzekiba auguely.

¹²Âwâlâ kulâ tâzehoguedyze inkâba xina, Deus emary lelâlâ tawyly xutuhomem kulâ, mâkâ xurâ keba modo aito ara. Deus agueho ara tâise aidylymo, akaemolâ olâ âdara adâidyly awyly agueim. Tagonro agâ tâsenuagaenzemo, tataen-ho modo takaze koendâ tawyly tientomoem. Ânguy Deus emary, ânguy Deus emary keba warâ adâkezemo. Arâ adâidylygue, ânguydo kulâ tawyly tânehonzemo.

¹³Konokudâ akaemo, Deus tugonotobyrydâba kulâ “Mâkâlâ xina igononi” tâkeduomo. “Deus xina nigonodâ mârâ âjjiam, iwâgâ xina aguehoem” xina kely watay olâ, âkealâ. Iozelâ xina koendâ adientyby wâgâ aguely, mâkâ tugonotobyry ara. Âkealâ, mâkâlâ âyanmo xina aguehoem agueim.

¹⁴Iozepa kulâ xina idatânry modo wakeduo: “Corintodâ adâitobyry wâgâ tuomaruneba Paulo, awâtârâ Deus itaumbryry egatuhu keba mawânâ” keduomo. Âyanmo udâhoem Deus âkeá kepa watay, aguehomo âkealâ tâise. Awyarâ xina nigonodâ olâ, unâ tâdâsemagueho egatuze. ¹⁵Urâ kulelâ inkâba, Deus itaumbryry egatuim modope lâpylâ. Koendâ inkâba “Urâ kulelâ Kywymâry Jesus wâgâ agueim” uguely, atângâ aguewâni modo ara. Tuomare kehoem olâ âduaymo watay, eagonro âji modoram Deus ugonotobyrydâ warâ agânhekyly modo wâgâ auguely. Toenzepa lelâlâ Cristo wâgâ mâuntuzedylymo, mâkâ ize ato ara amisededylymo ize wato. Xirâ âwanu mawânâ agânhetoem Deus aguehobyry. ¹⁶Aituo ise âkelo anaxi xina idâly itymo anary takaze lâpylâ, Jesus Cristo einwântuo lelâ tâdâsemaguely wâgâ unâ koendonro egatuze. Xirâ unâ ânguy negatuba atobyryam lelâ ise xina idâly. Arâ ise koendâ kuru xina iomaru adientyby wâgâ, âkelomo aitobyry wâgâ kulâba.

¹⁷Warâ myakâwândy Deus itaumbryry awo wâgâ iwenibyem awyly: “Tadawidyse donro watay, Kywymâry Deus anhekyly wâgâ lelâ nadawi.” ¹⁸Tywâgâ agueim, tywâgâ kulâ koendâ agueduo, agueho âdyem nitaymba. Jesuslâ iwâgâ koendâ agueduo lelâ âkealâ awyly xutuly.

**Corinto donro modo iozepa
enomedâni modoram
âzenokuohobyry**

11 ¹Xirâ ywâgâ augueho âdi-empa emaenwâdaungâ wao, tuândy ara kulâ augueday. Cristo wâgâ iozepa kulâ egatuim aguehomo mâenmaen-homo ara; augueho emaenwâdaungâ lâpylâ wao.

²Toenzepa âwâgâmo kâseguâdâdyly, Deus âwâgâmo âseguâdâdo ara lâpylâ, iozeno keba kulâ amânhedylimo wâgâ. Âwynsaundo tunizenry tokalâ uguondoam lelâ nhunwym nhegamely, iwydyem itoem, idânârà uguondo modoram inkâba. Arâ lâpylâ Cristo lelâ mâinwândysememo wawyly.

³Akaemo iozepa enomedâni modo aguehobyry einwânnipyryem âmaemo watay olâ, Cristo iomazeândyly imoimbyryem keanra âmaemo. Satanás, âgâuem itybyem, Eva enokumâmy, myara lâpylâ keanra akaemoam mâzenokuolylo. Awârâ koendâpa yeni-ro warâ. ⁴Jesus Cristo wâgâ âyanmo tâgatuzelâ ani xina. Xina aguehobyry meinwândâmo, Jesus meinwândâmo, Deus Ispiritury âyanmo nâedâ-ro warâ. Iwerâ olâ iozepa kulâ Jesus wâgâ aguewâni modo aguely mâindakylymo. Tuomare kehoem âmaemo, unâ iozepaom kulâ idase, Satanás eynynonro modo ârudylymo idase. Deus Ispirituryamba mâduruholylo. Toenzepa awârâ iekuâdâdyly.

⁵Iozepa inomedânimo aguely kulâ mâindakylymo. Ienanaji, yakabyra olâ akaemo kâuntuly “Unâ egatuly tutuze kehoem egatuim” keho modo. ⁶“Tonomegueim agueho araba kulâ Paulo aguely” tâkezemo. Âkeá lelâlâ keanra, koendâ kehoem auguepa lelâlâ wâne keanra urâ, Cristo wâgâ augueday. Koendâ Deus wâgâ tutuze olâ urâ, Jesus einwândylygue tâdâsemaguely wâgâ warâ. Awârâ âkealâ awyly, tutuze âmaemo, Corintodâ awitobyry, inomedâdomobyry mâenanâgueduomo.

⁷Unâ iwâkuru tâdâsemagueho âyanmo segatu, “Iepywadaungâ” uguepalâ. Iewanopyryguelâ ani kâzedyly; uguondo tynrenseim anhetânry modo adyese ani urâ. Arâ

awidyly ani, Deusram mâzehogue-ohomoem. Iozepa kulâ awidyly awyly adâkeze keanra âmaemo. Iozelâ olâ ani awidyly! Kaikâem widâ, koendâ amyguehon-homoem. ⁸Âduaymo unâ tâdâsemagueho kêngatuday, âkelo Jesus einwânni modo ani dinheru igononi kâzetoem. Tâmakeze lelâ ani urâ, âyanmo âdy kêenkabyra witoem. Akaemo âzeto ewy ani kêentyly, âmaemo mâzetomo ewy kêentyba witoem.

⁹Agâmo wawyly ume, âdy peba wituo, âdy âyanmo kêenkadaymba ani urâ, ikuâdâbyramo witoem. Cristo eynynâ kypemugudo Macedônia eynynâba âetyby modo olâ ani idânârâ ipa wato modo tase. Âyanmo dinheru kêenkadyzeba ani urâ; kêenkabyra ise urâ-ro warâ. ¹⁰Cristo xurâ wawylygue, augueho âkealâ awyly lâpylâ, Cristo agueho âkealâ awyly ara. Toenzepa inanry womaru, unâ iwâkuru tâdâsemagueho âyanmo kêengatuly tâbyguepalâ awylygue. Acaia einkâ udâday, tâpywazeba kulâ Deus itaumbryr kêengatuba witoem ânguy anienhonwâbyra ise. ¹¹Tâlâ âduaymo wakeim: “Paulo kydinheruru tienmakedyzeba awyly, kywynebyra tawylygue” keim. Arâpa olâ! Âwynedâmo wawyly, tutuze Deus.

¹²Âdy yam mâunduhomoem kêenkabyra gâlâ ise urâ warâ, iozepaom egatuwâni modo wâneam inomedâdomobyry epyryem dinheru nhekezedylymo myara. Iepywadoem auguely-ro watay, “Paulo emyenrolâ xina. Inomedâdomobyry epyryem dinheru tâkaze lâpylâ mawânkâ mâkâ” tâkezemo lâpylâ tâise. ¹³“Cristoram aguehoymbyem xina, iwâgâ aguehoem” tâkezemo wâne, konokuze kulâ olâ aguelymo. “Mâkâ xurâenlâ

xina aidyly” tâkezemo. Cristo emary aramo, koendonro aramo warâ wâne, tydani modo enokuze; konokuni kulâ lelâlâ olâ akaemo. Unâ Cristo wâgâ agueim nhegatuhoem aguehoymbyem inkâba akaemo! ¹⁴Koendonro aramo wâne, koendonro kebamo olâ. Tutuzenry keba olâ awârâ. Satanás, anju ara tohozele kehoem, Deus ingonotyby ara kehoem, tâepanâgueze, konokuze, arâ lâpylâ turâ modo tydani modo warâ nhenokudyly. ¹⁵Satanás arâ konokudâ-ro watay, emary modo koendonro ara tâise lâpylâ konokudoem. Deus olâ enagazenehonzemo, inakai anhetomobyry aralâ.

Paulo âsenagazedobyry

¹⁶Ywâgâ aguehobyrylâ ise augue-onto. Ânguy tuândy ara iepyra nidâ. Tuândy ara lelâlâ wâne iedylymo, arâlâ olâ auguely idataungâ, yagâ aityby âyanmo kêengatuhoem, Cristo emary wawylygue. ¹⁷Koendonro agânhe-tyby wâgâ augueduo, tuândy ara kulâ auguely, tuândy mawânkâ âwâlâ kulâ âzehogueni. Kywymâry Jesus augue-dyse ato araba augueho-ro warâ. ¹⁸Tâlâ mawânkâ âwâlâ kulâ âzehogueni modo, tywâgâ koendâ aguehonly kulâ ize ato waunlo modo. Awylygue alâpylâ ywâgâlâ kâinwenily, yagâ aitaymby modo wâgâ kâzehoguedyly warâ. ¹⁹Tonomegue wâne mâdutulylymo. Arâlâ olâ, tuomare kehoem akaemo âdy xutudânry modo agueho mâinwântaguedylymo. ²⁰“Deus ingonotyby xina” kewâni modo agueho tâmaenze âmaemo. Aguehomo mâinwântomoem adâkezemo. Âsejiguymo tâmakezemo, turâem tientomoem. Inokudomo tâmaenze âmaemo, âdara myguepa-molâ. Akadâmo kehoem âdutulylymo. Âwankuem âetâmo. Âwapagaindâmo. Arâ mâzeholylymo umelâ, izepamo

mipyra olâ âmaemo! ²¹Tuomare urâ, arâ aepyramo xina awylygue. Tywypaze tâise xina, akaemo inagazedomo ara inagazezemo.

Koendonro adienkyly wâgâ agueze ton-honreimbe-ro watay, tâegane lâpylâ urâ, Deus ewanuem koendâ awidyly wâgâ agueze, tuândy tâwâlâ âzehoguedo ara. ²²“Hebreu xina, âkelo iunu lâpeba” kelymo; hebreu lâpylâ urâ. “Israel iweompyry xina” tâkezemo. Mâkâ iwerypyry lâpylâ urâ. “Abraão iweompyry xina” tâkezemo. Mâkâ iweompyry lâpylâ urâ. ²³“Cristo emaryem âsewanirim xina” tâkezemo. Mâkâ emary lâpylâ urâ, akaemo takaze olâ koendâ wawyly. (Arâ augueduo, tuândy ara kuru auguely.)

Akaemo takaze tâsewanize lâpylâ urâ. Cristo wâgâ auguelygue ani akaemo takaze kâzetadãozedyly. Toenzepa tadapioguoze urâ, tokalâ kulâ inkâba. Toenzepa lâpylâ igueze-seaji tâise urâ. ²⁴Ypemugudo judeu domodo agui yapiogudâmo. Cinco

vezes, trinta e nove ykarydâ kadapio-guoly, judeu domodo ezewenry ara. ²⁵Romano domodo segue yapiogudâmo lâpylâ azagâ tokalâ warâ. Tuhugue tadamytâoze urâ, yâdyse tawylymogue. Azagâ tokalâ warâ kehoem pepi imâsedo ioday wato tytyze urâ. Azagâ tokalâ ieto wâgâ ani pepi iotagâ kehoem atuly; tokalâ iguandyly, tokalâ emedyly warâ ani paikay ywâru. ²⁶Cristo wâgâ ega-tuze udâzesedyly ume, kâmaynoem lelâlâ ani urâ. Paru toenzepa tahugâ-neim tâkuezagâze urâ. Tâmagazeim modo idâwanry oze yakaday, yawâtâmo, utoguydâmo warâ. Judeu domodo, ypemugudo, yâze tâkezemo; judeu keba modo ewy yâze tâkezemo lâpylâ. Xidadâ oday, poji anaym, parutabâ ikay warâ kâmaynoem ani urâ. Kâmaynoem lâpylâ ani urâ, “Cristo eynynâ âpemugulâ urâ” keim modo agâ, Cristo einwânni modo kebamo olâ. ²⁷Âwanu ton-honreim lelâlâ ani agânhekyly, kokozeâni kehoem. Âdatay



(2 Coríntios 11.25)

koendâ ykyba tâise urâ. Âdatay ani âdy kâinly peba, âdy kâenyly peba, toenzepa igâwynu ume âtâ kânhekyly peba tâise urâ warâ. ²⁸Awârâ modo takaze kehoem, kopaelâgâembaba Jesus Cristo einwânni modo wâgâ iekuâgu. Tâinwânsezemolâ wânkâ, Deus ize ato adyese molâ kely inanry kâpaunzedo; ykary wâgâ tâmânreimbe-ro waunlo ara inanry xirâ kâpaunzedyly. ²⁹Ton-honreba kulâ Jesus einwân nipe-ro watay, iwâgâmo tâjityenze winase ton-hondâzemo warâ. Cristo eynynâ typemugu Deus izepa ato anhe toem aienehoimbe-ro watay olâ inanry toenzepa kehoem kadahulily.

³⁰Ywâgâlâ auguedyседonro mâkeba urâ, ywâgâlâ auguely inanajimo watay olâ. Tâwâlâ kâsemaguehoem ton-honreba watobyry wâgâ ise auguely. ³¹Ugiewâdyly kulâ keba awyly, tutuze Deus. Deus lelâlâ mâkâ, Kywymâry Jesus Cristo nhunwym, iDeusry warâ. Aunlolâ koendonroem awyly wâgâ aguykely kinmopa kine. ³²Damascodâ wawyly ume, Pymâ Areta pymâem induakeyby sodadu domodo xidadâ odaji tâdâwânto nhuan-huhoem adâkeze ani, iegasedaylâ yawâtomoem wâne. ³³Yataen-ho modo olâ ani cestu imâsedo odaji ietadâdâmo. Xidadâ sahodâdo ewy tuhu etyhobyry oze ani mârâ oday ienâtâguylymo. Warâ ani mâkâ pymâ yâze kerim amaymba kâsemaguely.

Paulo enu oday âtygadobyry

12 ¹Ywâgâ augueylâ wao mynra koendonro, tywâgâ aguenriem Cristo ingonotyby wawyly kânehohoem, ywâgâ koendâ auguedyсеba wawyly umelâ. Iwerâ kâengatuly ise uguondo enu oday âtygadyby wâgâ, Kywymâry Jesus eyam nhutuen-hoymby wâgâ warâ.

²Mâkâ uguondo, Jesus einwânni mâkâ. Mâkâ aitobyry tutuze urâ. Awârâ wâgâ âyanmo kâengatuly-ro warâ. Katorze anupe mârâ aitobyry. Deus âji kaynonroam nhadyly eyedâ tatoam. Kâuntuba urâ, âdara nhatobyry, egadopyry atay, mâkâ lelâlâ atay warâ awyly. Deus lelâ âdy aityby xutuim kuru. ³⁻⁴Augueondyly. BAUK alelâ myani mâkâ uguondo adaholy âji koendonroam, Deus ety anary, Paraisoram. Âdara aitobyry kâuntuba urâ. Egadopyry lelâ keanra ani idâim, mâkâ lelâlâ keanra idâim warâ, kâuntuba urâ; Deus lelâ xutuim. Târâ awyly ume myani tâjitanru ânguy agueho keba kehoem indadyly. ⁵Tuomare kehoem ise mâkâ uguondo agâ aityby wâgâ auguely. Mâkâ uguondo Deus ezaxi satybylâ urâ uguepa wawyly, tâwâlâ kulâ ywâgâ auguedyсеba wawylygue. Âdaunlo kurâ aralâ ton-honreba wawyly enehoiw wâgâ lelâ ise auguely. ⁶Tâwâlâ kâzehoguedyly watay, tuândyem wawyly mâkeba tâise, âkealâma tâise auguely awitobyry wâgâ. Tâwâlâ kulâ kâzehoguedyly izepa olâ urâ. Agânhetyby wâgâ, auguehobyry wâgâ warâ mawânâ ywâgâ koendâ aguehonly ize wawyly, ienu oday âtygadobyry wâgâpa.

⁷Toenzepa iwâkuru modo kâentobyry, kâindatobyry wâgâ warâ, yagonrodo takaze kehoem koendonroem kâdutuly wipyra witoem, tâwâmase ani urâ, tyguyreimpe unru oday-ro waunlo ara kehoem ani kâpyneândyly. Xirâ kâsenagazedo Satanás emary âeni yapioguze-ro waunlo ara, kâzehoguebyra witoem. ⁸Azagâ tokalâ warâ Kywymâry Jesusram tâkaze urâ, xirâ nhetyhoem. ⁹Warâ olâ ani Kywymâry Jesus aguely: “Kâentyba ise urâ. Agâ koendâ olâ ise urâ. Mâsenagazedyly mâenmaen-hoem

on-honru xuduze urâ. Awârâ lelâ ise tâlâ mato. Ton-honreba mâdutuly-ro watay, agâlâ ise urâ on-hondâze” kely.

Awylygue tuomare auguely ton-honreba wawyly wâgâ. Arâ ise idânârâ nhutulymo, Cristo xurâem awidyly, yagâlâ awylygue, won-hondâdâ awylygue warâ. ¹⁰Tuomare olâ urâ Cristo xurâem wawylygue, won-honrugue âdylâ aiese ton-honreba wawyly umelâ. Iwâgâ âwankuem yedylymo umelâ; kâmaynoem wawyly umelâ; Jesus einwânni wawylygue kâzenagaze-oly umelâ, toenzepa iekuâdâni modope awyly umelâ, tuomareba wipyra olâ urâ, Cristo aguehobyry aiese. Ton-honreba wituo lakuru, Cristo eon-honrugue kozohondâdily.

**Corinto domodo wâgâ
Paulo âseguâdâdobyry**

¹¹Tuândy ara auguely, ywâgâlâ koendâ augueduo. Âmaemolâ olâ arâ auguehoem aienehoim. Ywâgâ koendâ amyguelymo-ro watay, ywâgâ augewâpyra tâise keankâ urâ, uduery modo “Cristo ingonotyby keba mâkâ Paulo” keduomo. “Cristolâ xina iwâgâ aguehoem agueim” kewâni modolâ mâen-hogueguylymo. Yakabyra olâ akaemo! Akaemo Deus xurâem anhekyly, adyese lâpylâ urâ, akaemo anhekyly takaze olâ agânhedyly. ¹²Agâmo wawyly ume Deus eon-honru enehoim, adyese ani urâ. Ânguy anhetânry adyese ani urâ. Kurâ domodo adawihoeim aieni modo adyese ani urâ. Deus eon-honrugue adyeseim lelâ omazeânehoinmo adyese ani urâ. Awârâ modolâ Cristo itaumbryr egatuze igonotyby wawyly xutuen-hoim. Toenzepa tâpyneânzelâ ani kâsewanizededyly. ¹³Âkelo xidadâdâ Jesus einwânni modoem agânhetyby, adyese lâpylâ urâ âmaemoem. Cristo wâgâ kêenga-

tuhobyry iepywadomoem âdaunloenlâ kêenkabyra olâ urâ atârâ Corintodâ. Âyanmo “Iepywadaungâ” uguepa wato-byry wâgâ yagâ tyewiâse âmaemo watay, enanânehonwâdaungâ wao.

¹⁴Azagâ lelâ âyanmo IU ise tâtâze urâ, udâontoem on-hondybyem urâ-ro warâ. Yaintuo, âdinherurumo ewy kêenkadaymba ise urâ. Ywynedylymo, yataen-hoem mawylymo warâ agâmo ize wato, âsejiguyimo mâkeba. Tâjiunwym mawânkâ tymery tienamanâdoem xuani, tâjimery keba tunwym xuani. Unwânmoem kâdutuly; ietomoem kêenkadyze inkâba urâ. ¹⁵Âyanmo udâly-ro watay, tuomare kehoem ise dinheru tâlâ wato kainly, nhetomoem. Âsewanize lâpylâ urâ, inomedâdomoem, imâem Jesus wâgâ mâuntuhomoem warâ. Toenzepa âwynedomobyry mâendilymo umelâka âdiempa kulâ ywynedylymo?

¹⁶“Âkealâ, Paulo kagâ tatay, tâzetoem dinheru nekadaymba” keze âmaemo. Tâlâ olâ ise warâ aguewâni modo: “Konokudyly xutuim olâ awâkâ. Jerusalém donro âdy pebaom modo xurâem dinheru tienmakeday, turâem kulâ aidily” keimpe ise. Arâpa olâ. ¹⁷Tutuzelâ âmaemo, âdaunloenlâ inokubyrâmo wawyly. Uguondo modo âyanmo xigonodâ, Jerusalémdâ âdy pebaom modoram dinheru mâundudyse matomo emakerin-em. Âdykâ gâlâ mârâ dinheru ewy urâem kêentyba urâ. ¹⁸Tito âyanmo idâhoem augue. Cristo eynynâ kypemugu eagâ xigonodâ. Tutuzelâ âmaemo, âdaunloenlâ inokubyrâmo awylymo lâpylâ. Urâ, Tito warâ âzekiba xina koendâ aidily, agâmo tawyly ume. Âzekiba lâpylâ ani xina inokudyzebamo awyly.

¹⁹Xirâ kata mâintainlymo watay, wakeze âmaemo: “Paulo kyam niweni,

tuduery modo aguelygue tâsemaguehoem kulâ” myguelymo. Arâpa olâ. Deus tutuze tarâ kâinwenily âdy awyly. Cristo kâinwenihoem aguehobyrylâ kâinwenily. Idânârâ tarâ kâinwenily, imâem Jesus mâinwânsezedomoem. ²⁰Toenzepa âwâgâmo yakalagu. Âyanmo yaintuo, ize wato araba kulâ keanra ise nhedylymo. Inudâbamo kulâ lâpylâ keanra ise augueho, agâmo agânhedyly warâ. Tâlâ keanra tuduekeim modo, tâdâtyzedyly keim modo, iewiâpani modo, turâem lelâ warâ ize-tonro modo, tâdâseudyly keim modo, tâdâtunâguedyly keim modo, sawoem ini modo, tadakaladâdyly keim modo warâ. Awârâ modo kêandyly mawânâ kâyntagulyly, yaintuo. ²¹Tâlâ âduaymo inakai aieniem sahozeyby modo. Eagâ tohogüin-hobyry keba kulâ xynanâdyly nimopa. Inakai modo, kywypado modo kehoem anhekylymo. Deus izepa ato adiyndylygue âjityendânry, adiyndyly timodyzebamo-ro warâ. Yaintuo, toenzepa âjityenze urâ Cristo nheinwântoem agânhenehoymby modo arâ adâidylymo nimopa awyly kêentuo, toenzepa âpybazeze urâ Deus enado.

**Tâdâturudo xypyry,
tâdâsedaenguho-ro warâ**

13 ¹Azagâ tokalâ warâ âyanmo udâly idyly ise. Deus izepa ato aieni modo agâ ton-honre kehoem agueze urâ. Arâ aguely olâ ise, azagâ, azagâ tokalâ warâ inakanhe aitomobyry wâgâ agueimpe-ro watay lelâ. Arâ mawânâ Deus itaumbryry awo wâgâ iwenibyem awyly: “Tokalâ kulâ inakanhe aitomobyry wâgâ agueim watay, âkealâ awyly tâinwântuneba. Azagâ, azagâ tokalâ warâ egatuin-ro watay lelâ einwândyly” kely. ²Agâmo wawyly ume, Deus izepa ato aieni modo adâidyly inmohomoem xuru-

dâmo. Akaemo ewy inakanhe tawyly nimopa kely xidadâ olâ. Ton-honre kehoem eagâmo agueonse urâ. Tâlâ pylâ kâxiguebygueduo Deus neinwâmpyra ityby modo.

Awylygue ise, udâondyly-ro watay, ton-honre kehoem aguely idânârâ Deus aguely sakani modoram. ³Udâduo, inakanhe aini modo ton-honre kêenagazenehonduo, xutuze âmaemo Cristolâ auguehoem agueim awyly. Ton-honreba nitaymba Cristo. Âduaymo ton-honru enehonze mâkâ-ro warâ, inakanhe adâidyly imodânry modo kêenagazeduo. ⁴Âkealâ, kruz wâgâ sakâjiday, ton-honremba myakâwâm, karalâ. Deus eon-honrugue olâ myakâwâm, kurâem itondyly, âdaunloenlâ nigueompyra tâitoem. Alâpylâ urâ ton-honreim keba lâpylâ. Arâlâ olâ, Cristo agâ tokaleom ara wawylygue, Deus eon-honrugue, ârudylymo imâem mâinwântomoem.

⁵Tâwâlâ adapâiguwêdaungâ, “Cristo tâinwânse lelâlâ wânkâ urâ? ‘Tâinwânse urâ’ uguely kulâ?” kewâtaungâ tâwâlâ. Cristo xurâ lelâlâ mawylymo xutuwâdaungâ. Jesus Cristo Tyispiritury nigonodâ odaximo âxidâze. Awylygue ise Cristo xurâem lelâlâ mawylymo aguely. Cristo xurâ mawylymo, xutuze âmaemo. ⁶Arâ lâpylâ Jesus Cristo xina agâlâ awyly, emary xina awyly warâ mâuntulylymo ize wawyly.

⁷Aunlolâ Deusram xina nhekadyly âmaemoem, izepa ato amânhepyra mitomoem. Arâ xina nhekadyly, koendonro amânhesezedylymo ize xina awylygue, âduaymo Deus ewanuem adientyby wâgâ koendâ adâkehon-hoem kulâ inkâba. Deus izepa ato aiedyly mâinmolymy watay ise âyanmo ton-honre auguepa wawyly, yaintuo. Arâ-ro watay ise uduery modo aguelymo: “Tywâgâ aguenriem

Cristo aguehobyry mâkeba awâkâ Paulo, Corinto donro modo duay ton-honru nenehomba mawânkâ. Koendâ tâwanu anientaymba” kelymo. Aguelymo umelâ Deus ize ato amânhe-dylymo olâ ize wato. ⁸Jesuslâ tywâgâ aguenriem ugononi awylygue, kono-kuni kulâ agânhetaymba urâ. Iozeno lelâ agânhekyly. Âwâlâ kulâ imâem yenehoim agânhetaymba urâ.

⁹Tuomare ise urâ, toenzepa Cristo mâinwândylymo, ize ato amânhe-dylymo warâ, myguehonlymo kâindatuo. Awylygue ise pymâ tyewiâseim ara awipyra wawyly, yaimpygueduolâ ton-honre agâmo auguepa watobyry wâgâ, uduery modo koendâpa awidyly wâgâ kywypadoem, ton-honrenryem warâ wawyly aguezemo. Awârâ modo wâgâ kulâ kâtynanâbyra olâ ise urâ. Awylygue aunlolâ warâ auguely Deusram: “Corinto donro modo koendâ iekâ, idânârâ adienkyly wâgâ, adâkeho wâgâ warâ nheinwântomoem” uguely inanry. ¹⁰Awyarâ udâly iraynâlâ, xirâ kata kâingonodyly, âduanomo Deus izepa ato aieni modo xina saindyly iraynâlâ, inakai aiedyly inmohomoem.

Idânârâ xirâ âurutomo koendâ mâinda-dylymo-ro watay, udâduo, Kywymâry Jesus Cristo eon-honrugue inaga-zedaymbamo ise urâ. Jesus won-honru nhuduly ani igamanâdomoem, âtywanâdomoemba. Itâni emyenro xina, sakalagueim emyenro keba.

¹¹Cristo eynynâ ypemugudo, kâsedaenguly ise xirâ. Deus amidysemo ato ara amidylymo etaungâ. Âurutomobyry koendâ inwantague-daungâ. Tokalelâ angahumo oday âunârymo nidâ. Tâjihoguzeba, tâtueba-zeba warâ itaungâ. Arâ-ro watay, Deus toenzepa kywyneni, tâkuâgueba kyeni warâ aunlolâ ise agâmo awyly.

¹²Âwaparymodâ tohonuguze âsedaenguwâdaungâ, Cristo eynynâ âjipemugüem mawylymo mânehon-homoem^a.

Idânârâ Deus eynynonro modo idaenkulymo lâpylâ.

¹³Kywymâry Jesus Cristo koendâ nhetomoem, Deus âwynedâmo tawyly nhenehon-hoem, Deus Ispiritury agâ-molâ itoem warâ kâenkadyly.

Alâ kulâ ise âyanmo kâinwenily. Paulo

^a 13.12 Saguhoem Jesus einwânni modo tohonuguze âsedaengulymo. Iwerâma tâpymogoynze kydâsedaenguly.